

敬

事

草

敬事草卷十九目錄

請宥御史曹學程揭帖

乞休引年疏

再疏辨白瑜王士騏事

備陳病苦疏

人言可思疏

謝遣中官盧受捧 聖諭到寓疏

賀上 聖母徽號揭帖

病薦難瘳疏

敬事草 卷十九 目錄

老病餘生萬無留理疏

直陳危苦至情疏

久病尸官疏

揭帖

病篤情危疏

哀懇 聖慈疏

釁深病篤疏

七十一懇疏

修實政放朽臣疏

七十三懇疏

七十四懇疏

七十五懇疏

聞言增懼疏

七十七懇疏

七十八懇疏

無端污蔑萬死難甘疏

人言踵至疏

瀝血鳴冤疏

得旨回籍謝恩疏

餘忠疏

又疏草附

歸家謝悃疏

辭甘鎮加恩疏二

敬事草卷十九

柱國少傅兼太子太傅吏部尚書中極殿大學士臣沈一貫

請宥御史曹學程揭帖

三臣題臣等竊惟皇上十餘年來日為海內

憂勞而尤為寧夏朝鮮播州雲貴兩廣等處用
兵憂勞天祐國家有亂輒平真乃聖謨獨運

皇威遠揚文武將吏用命之效然其間蔓延波
及或死或黜或繫或戍或及妻孥未蒙恩澤者
不無其人茲者詔書軫念加之宥卹以昭浩蕩

之恩尤足以還元氣召太和也昨刑部奉詔為
犯官曹學程請命臣等敢以一言贊成惟聖
明俯納切惟學程之禁十年於茲矣聞其在獄
中悔艾已罪感戴聖恩甘萬死而不辭每咋
舌而自痛此人人所皆知也臣等每逢秋審之
時為之凜凜惴惴即在廷文武諸臣無不為之
凜凜惴惴非臣等及在廷文武諸臣舉有私于
學程亦非學程能一一而遍懇之然而共加哀
憐豈謂學程盡無罪亦天理人情有所感發而

不能自過也御史雖七品官而立螭頭之前為
天子所特盼嘗許以風聞言事而不追咎其是
非其來久矣乃者一旦不免則顧惜國體者咸
曰煌煌聖朝安可有殺言官之名為御史惜者
又曰此等事豈臣子忍見忍聞諺云兔死狐悲
物亦有情而況於人也抑不獨縉紳為然凡此
都人每遇秋審之時滿街聚觀指而相語曰此
曾御史也有為之下淚者不獨悲之而又有慰
之者曰聖天子在上必有矜赦之目毋過自

苦故學程每每對人泣而人亦為學程泣此亦
何心哉不過為冠裳體面生此一悲愴也間知
學程家事者悲之愈甚學程有母年九十餘而
日夜望其子之歸一訣以死至欲自來叩闕而
遠不可來老又不可棄尤人子之至痛也且學
程羸瘠如鬼物鬚毛盡白不能久待餘命然人
雖悲之莫敢為 皇上言之夫威在上誰敢輕
犯今幸有覃恩詔書臣等恃此無恐昧死一言
竊謂學程得罪原因朝鮮意為國家自朝鮮湯

平以來既有詔赦矣而不能及辛丑覃恩兩下
詔書矣而又不及今復下詔書矣數經大赦之
後望 皇上姑畧其罪不惜一特恩也矧 聖
主以孝治天下恭上 聖母徽號在邇垂錫類
之仁念及其母子至情又宜寬宥宿怒霽威顏也
臣等與合朝及都人共祝禱之意不為 皇上
論法但為 皇上論情情有所可憐法有所可
訕事有不可以例拘者惟此一大慶典望 聖
主以天地至仁而原有之萬一尚謂罪不可釋

則乞從末減坐之成遣恩威莫非至德輕重惟
求一生惟 皇上俯察群情而賜之俞允蓋學
程直犯龍鱗天下莫不知 皇上尚肯見容則
凡天下偶觸法網過誤獲罪者更何人之不宥
豈獨鮮三面之網真乃流天覆之慈天下謂

皇上不難克己弘物一至于此宥一人而千萬
人悅正此之謂從此謳歌頌祝續續相望以前
怨咨一朝都泯豈非 聖明至美之事臣等不

勝顙望稽顙之至

正月十七日

乞休引年疏

奏為報國多慚引年宜亟懇乞 聖慈俯容休
致以全終始事臣惟萬物之理無有春而不秋
夏而不冬者自古人臣七十致仕具載典章在
朝廷為體下之仁在臣子為自諒之智明分詎
重政幾况老病難支久宜罷免如臣者乎臣稟
氣最薄與疾為生終年藥餌參半飲食自隆慶
二年偶叨一第竊祿三十九年中間供事講筵
者十有三年供事內閣者又十有三年一生閱

歷皆在日月之旁仰惕威嚴俯深憂灼但圖竭
蹶何論精神是以暗鑠明銷不可具述歷懇間
退誠自知其鞭策之不可復施也今年已七十
例該休致首揆重荷豈得久叨昨被人言幾成
齏粉聖主在上委曲保持臣每念此不勝感
涕正以才本庸虛身又老病血氣衰耗心思昏
塞今聖政一新四海歌頌雖手足抃舞樂觀
德化之成而病已沉綿有難復起譬如百卉方
生而薜草先死亦臣祿命之已盡耳呼天號地

誰與憐恤不得不涕泣祈禱于 君父之前昨
十二月二十二日具瀝此情兼請辭俸未蒙省
發敢因引年明例准容致仕庶全臣道之終始
不至折鼎覆餗辱命殞身以為國羞

正月二十一日上

十五
日奉

聖旨卿忠誠練達燮理功高精力有餘正堪繁鉅
何可循例引年復堅前請且朕尊上 聖母徽號
稱大禮在邇輔弼首臣尤宜率先百僚聿成盛典
便可仰遵屢旨亟出贊襄以副朕惓惓注望之意

商賈通志卷之九
慎毋再陳吏部知道

再疏辨白瑜王士麒事

奏為久病宜斥聞言省疚懇乞 聖明早賜乾
斷全臣晚節事臣自揣至愚素無榮望伏蒙不
世恩造寄以政本非不欲勉策疲駑以報萬一
而疾疚侵凌衰年益甚自舊夏以至今春痰火
纏綿頭目眩暈腸胃秘結飲食不進又左臂麻
木不能屈伸背心發消如火焦灼逢寒畏寒逢
熱畏熱醫不能定一人藥不能主一方終日徊
徨委化待盡仰荷 聖恩見寬不加譴責屢勤

使命促出供事計伏枕以來八閱月矣調理絕無一效而病勢日有增加非惟不能趨閣辦事至如極大典禮聖母萬壽聖節冬至令節元旦令節元孫誕生慶典頒詔天下臣皆不能扶掖赴闕少伸舞蹈之忱今恭上聖母徽號在邇頒詔又在邇惟有中熱而兩足已廢不能發跬步矣正月二十一日引年及期援例懇乞又奉旨未俞皇上過憐臣臣亦未嘗不自憐而天不憐臣誠有所限也且臣被人刺螫幾無

完膚言者猶以隱語相加罪戾餘生何宜復辨
既有指名得無一言白瑜之謫出自中旨其時
臣有揭帖申救必在御前即瑜未嘗有一語疑
臣而倏言謀洩至此茫然不知所謂瑜見在京
可質問也王士麒臣之門生也豈不欲厚而故
擠之乎事發於御史康丕揚丕揚嘗論臣者非
阿臣者不可謂臣意也至其為民則再三奉
上命出嚴旨而士麒亦自謂得此厚幸非臣擠
之又明甚臣無負于士麒也今萬方嗷嗷誰非

臣罪而獨以二事責臣亦厚矣然不罷退終不
足以少贖臣罪而慰天下之心伏乞 皇上察
臣情實危苦病實顛連早賜允歸苟全終始無

任哀泣之至

正月二十六日
上二十九日奉

聖旨朕以大禮將行趣卿早出以成盛典望之甚
殷何又續有此奏卿調理多時病且良已至於白
瑜王士麒之去各有所為昭昭在人耳目與卿何
干卿宜以國事為重勿介浮言益堅去志便遵前
旨速出贊理毋負朕始終倚毗之意吏部知道

備陳病苦疏

奏為備陳病苦真情仰懇放還事臣于正月間
奏為報國多慚引年宜亟懇乞 聖慈俯容致
休事隨又奏為久病宜斥聞言省疚懇乞 聖
明早賜乾斷事俱奉 旨未允五年乞去章無
慮數十上矣以至愚不肖多罪戾之餘生而
皇上過眷過留委任隆重開諭至切昭雪甚明
百身萬死莫能報稱顧自見極明自量極審更
無補報之期惟去可以明志伏誦 明旨謂臣

精力有餘似謂猶愛其餘而不為國家用者臣
自戊戌以來獨直五年左右前後絕無可語風
雷霜雪一不敢避自分九死橫分持赤心以報
主恩不敢自愛也自今而言則毛骨猶聳蓋向
也精力尚存恃愚忠而妄任今也精力盡竭一
追思而輒驚任愈久而心愈碎疾愈深而膽愈
破時命乖謬動逢凶咎欲如向者之所為不可
得矣榮枯生落各惟其時人能與造化爭乎加
之家難頻仍情事迫逼魂夢紛擾涕淚淋漓鐵

石為人亦當銷隕蒲柳深秋桑榆大暮益難堪此
皇上尊上聖母徽號正臣子快覩天顏歡
承慶典之日遠奉既久拜辭不遙心馳闕廷萬
分中熱然與其顛越班行以為百執事羞而再
辱柱下惠文之章則寧輸瀝苦情早賜罷免伏
望皇上始終矜臣聽其歸老以釋重負生不
能效犬馬之勞死亦圖蛇雀之報

二月初二日
上初五日奉

聖旨卿昨引年乞休已曾奉旨勉留大禮在邇尚
須時下即出副朕惓惓之意所辭不允吏部知道

人言可思疏

奏為求去當亟人言可思仰望聽臣引身全臣
晚節事臣聞古人出處三讓而進如此其緩禮
也一辭而退如此其急義也乃今而知進欲緩
退欲急非惟禮義當然抑亦見幾之智也臣之
宜去勢窮理極臣之求去情迫詞危而猶未一
俞皇上之謬愛非臣之所宜自處也昨見御
史蕭淳揭帖臣深感其相成之雅能言臣之所
欲言臣待此甚急而皇上視此益緩舉家徬

徨至于痛哭無所聊賴之甚矣昔申時行王錫爵之賢人之譏刺者猶不遺餘力終無以安其身故王家屏寧抗皇上之威嚴而拂衣以去不能濡忍以受騰沸之口人言之可畏甚于天威之可畏臣無三臣之賢而集有三臣之苦有不可不避之銛鋒無再可銷之朽骨伏懇皇
上俯垂矜憫以允三臣之去者允臣一去早放一刻免臣一刻之災官九遷不足為榮恩九鼎不足為重

二月初五日
上初十日奉

聖旨卿屢疏乞歸朕再四勉留君臣大義已自分
明何為又有此奏非朕所望宜即出贊襄不允所
辭吏部知道

謝遣中官盧受捧 聖諭到寓疏

奏為謝恩事臣乞身在寓蒙欽遣文書官盧受
齋捧 聖諭諭元輔朕尊上 聖母徽稱大典
在即卿為元輔宜率百官行禮恭祝 萬壽康
全君臣大義且卿眷委年深任勞任怨朕所鑒
知豈可執浮言引身求去卿心何安宜即出贊
襄以副朕惓惓佇望至意特諭卿知欽此到臣
私寓開讀臣伏枕叩頭令臣男尚寶司司丞沈
泰鴻代臣就香案前望闕謝恩訖恭遇 皇上

躬舉大禮尊上聖母徽號千載一時從來希
有臣忝首揆誠宜匍匐闕庭快瞻盛美况蒙特
遣近臣下臨宣諭凡有人心孰不思奮豈容更
有遷延但臣四體委實難支恐致失儀不敢復
出感戴天恩真萬萬倍于常情自知報答不盡
世世生生願為犬馬也所奉聖諭臣謹什襲
尊藏以為鎮家之寶臣無任感激深切之至

初十日上
十二日奉

聖旨覽卿奏謝朕知道了卿宜善加調攝早出贊

褒以副朕眷望之意禮部知道

賀上 聖母徽號揭帖

題恭惟 皇上德厚皇彝孝鍾天性所以尊養
聖母順志承歡者無所不備茲復以元孫薦生
崇加徽號躬御殿廷祇奉冊寶天日熙和神人
協慶百官萬姓靡不欣欣布聞九有彌多喜色
光天盛事動地歡聲臣猥以在告不獲隨侍班
行同伸蒿祝下情不勝踴躍抃舞之至謹具稱
賀以聞

二月十一日

病薦難瘳疏

奏為病薦難瘳終負恩眷望乞聖慈矜憐即
賜退休事臣老病妨誤乞休乞假之章屢上而
恩諭輒下昨又蒙遣文書官特捧聖諭促臣
即出以恭承聖母徽號大典且憫臣任怨任
勞不宜以人言求去聖眷殷惓天語諄切父
母愛憐不能違此臣伏枕叩謝不覺失聲號慟
誠念受眷極深既難堅執求去而又念嬰病已
薦無以仰慰聖心去住兩難進退維谷當即

回奏敘謝不料數日以來病不減而加甚春肝
鬱火欲發不發耳目都無見聞心思益以憤亂
撫躬悲歎不能為今生犬馬止可作來世蛇雀
矣功名富貴盡同浮雲利害毀譽都付身外惟
親墓未修尚懷耿耿得一覩丘隴即死不恨臣
以老病則宜致仕以罪戾則宜削籍以省墓則
可予告惟 皇上早賜一命此恩視留恩更大
天地不足比高厚江海不足比寬廣也臣無任
泣血哀苦披陳仰望之至

二月十八日上

老病餘生萬無留理疏

奏為老病餘生萬無留理懇乞 聖慈亟賜放
還事臣于十八日又具疏請去祇候 俞音未
蒙批發臣今命如朝露氣急聲嘶敢此復瀆幸
哀憐之 皇上愛臣太過留臣太殷臣福薄運
窮擔載不起膏肓深錮適增罪尤惟 皇上賜
之休罷雨露臣者至深覆幬臣者至大也昨見
給事中王元翰論臣之䟽析義至精辨理極密
字字足為臣助請行行足為上贊決臣不勝心

感不勝忻喜智竭昏迷多言多過但其不意急
求一去仰望 皇上畧其詞而憐其意哀臣醉
生夢死之人無益有損縱囚鹿于山林放窮魚
于大壑舉家合掌頂戴不盡

二月二十
日上

直陳危苦至情疏

奏為直陳危苦至情早乞 天恩賜骸歸里事
臣以病極難強自去冬固求休免恭遇元孫誕
生大典肇舉未敢數陳正月以來節假日多比
遇徽稱詔發又未敢瀆今國家慶祥駢會悉已
告成 皇上德政俱新海宇歡誦伏乞少垂睿
思放臣歸休臣哀病日篤委實難起心神恍惚
都無想念只一親墓未修寸草猶在消息盈虛
四時有自然之序人力無能如何 皇上即留

臣而天命不留亦不能強也臣戰戰慄慄怯于
修詞似亦不必再以煩詞上瀆惟皇上俯念
臣千苦萬苦之情亟賜一允俾之生入里門歸
正丘首臣無任悲酸禱祈睇望之至
二月二十七日

久病尸官疏

奏為久病尸官沉痾難起懇乞 聖恩早放以
飭新政事臣奉職無狀自壬寅來無歲不引去
所上奏揭有六十六懇矣煩瀆 聖聰即臣亦
自厭之而况 至尊乎頃日連上三疏俱未蒙
發臣非不欲再效尺寸顧衰憊無比氣息奄奄
不能一日苟容 皇上靜攝深宮朝講久廢臣
等寡寥數人又卧私室曹署空虛君臣宴安脫
有叵測雖寸斬臣何益 皇上宜決奮乾綱一

肅群吏當去者去當留者留當補者補始可震
耀觀聽如臣冒忝合膺首黜不敢覬求寬典累
新政也臣罪戾當罷斥老病宜致仕惟復哀憐
其情事未伸或賜一假謹束身負鎖以請臣不

勝涕泣懇禱之至

三月初四日上

揭帖

題臣仰荷 皇上隆恩天高地厚 皇上留臣
數四而臣求去益堅豈戀主之心不若犬馬念
臣釁深力竭理極勢窮斷斷不可復留亦斷斷
不能復留泣俟 俞音以刻為歲去冬具疏辭
俸雖未蒙允發然曠職經時萬難素食入春以
來一切常俸柴薪廩餼俱不敢受閣中文書雖
尚列臣名然是相沿舊規旬月以來一切奏題
票擬俱不預聞輾轉呻吟僅存喘息形如朽木

氣同死灰 皇上縱欲留臣不過人世一枯骸
明廷一剩物豈徒無益為累滋多萬苦千悲總
欠一去非 皇上憐許誰其憐之臣之狼狽命
懸絲髮 皇上未忍迫臣以死宜早放一歸臣
生死去就於國家僅如蟻蠊也倘垂念舊物未
便捐棄亦乞省墓一假歸田 聖明曲體人情
但祈早決耳臣無任痛哭懇禱之至

三月初四日上

病篤情危疏

奏為病篤情危懇望 天恩早賜放免事臣累
疏陳懇乞求退身 聖恩至弘未蒙矜允然臣
桑榆景晚不可回光犬馬病深難以療藥未遂
投閒之請日增妨誤之憂今攀想都盡情思淒
慘但得一歸以正丘首不敢以重複多言瀆干
聖聽寥寂短章意則悲切惟 聖慈哀憐之臣
不勝戰兢涕泣之至

三月十二日上

哀懇 聖慈疏

奏為哀懇 聖慈俯憐決去病臣早賜裁允事
臣之求去自二月十八日至今三月十二日連
上五疏一揭不蒙省發臣雖至愚豈不畏威豈
不感恩何宜懵然蠢然觸突無已竊自揆量萬
難再留骨肉並銷涕淚俱盡狼狽情狀舉朝共
知草䟽乞歸六十九懇矣伸紙吮筆詞語亦窮
然胸中鬱勃而口中囁嚅不敢有言不能不言
也頃者雲南一事滿朝方奔走祈請而 皇上

一言立斷臣雖病憤之中不覺躍起使皇上
英斷每事如此允臣一去亦復何難庶政立見
改觀群寮誰不悚息螻蟻微臣亦何必經歲杜
門抱向隅之泣也臣今氣如游絲忽斷忽續支
體僅具而營衛脉理無不敗絕滅燈之燄豈能
久延回頭而望生門甚難順途而入死地甚易
譬之折翼敗毳不飲不啄投之深林未必能活
而閉以密樊縻以華纓主人以為恩此鳥以為
苦必無長幸祇速死耳臣一去之外更無餘望

父臣之去即是恩隆千愁萬懇惟在早決臣不足
惜毋貽國羞臣無任痛哭懇祈之至
三月二十日上

釁深病篤疏

奏為釁深病篤虛忝恩私一月四請懇求罷免
以除朝籍事臣之乞骸前月內具有三疏一揭
今復拜疏計七十懇矣日夜涕泣惟冀一俞忝
居首列與任一事一職者不同尚係朝籍辱國
良多不但一身而已每草一疏心如烈火通身
內外無不焦灼豈不欲少自寧息靜聽處分而
得罪愈深不可救解臣不勝急而 皇上視之
與等閒無異非視臣事太緩乃視國事太緩也

謂臣當去而牀簣顧望咎刻捱延是何不揣無
耻之甚安有不揣無耻之人而尚可稱百揆之
首者乎政體虧負已極真明時一恠物必不可
復留國家用人乃取實用無用宜去更何持疑
伏望 皇上俯從人心以慰天下之公俯從臣
心以慰一物之私省發罷歸縱不能報國可不

甚辱國

四月初二日
上初七日奉

聖旨今國家多事卿為元輔正宜極力擔當如何
日久不出非朕所望宜即勉強入閣贊理毋辜朕

心吏部知道

敬事草

卷一九

三

七十一懇疏

奏為牢疾纏身萬難再起七十一懇仰祈放歸
田里事本月初二日臣奏為釁深病篤虛忝恩
私一月四請懇求罷免以除朝籍奉 旨不俞

垂死之人氣急聲嘶欲敘感激而詞不能達非
負恩也臣耳聾目暗齒髮俱盡不復成人入春
以來脾肺盡傷四肢拘攣又加一痰迷之疾已
成牢固之症僅餘游絲未斷無醫可療遷延不
去千負萬負臣惟今日國家誠為多事竭力擔

當臣子分也竭力必資精力而臣力不能呼吸
適成擔誤 皇上如以國家為念必宜振奮乾
綱大加整頓不宜留羸敗之臣虛填朝籍自昔
首臣休致者甚多即近如申時行王錫爵王家
屏俱蒙 聖恩乞去惟趙志臯溘亡京邸使人
悲酸臣今若不自懇 皇上何由而憐伏乞

聖斷迅發乞臣休退免令後人復以悲志臯者
悲臣臣不勝哀涕凝盼之至

四月初七日

修實政放朽臣疏

奏為修實政放朽臣以圖維大計事臣猥以薄劣忝竊首揆贊襄無功幹旋無術天下日就危殆罪皆在臣切思忠臣愛君死猶尸諫遂婦出門猶頻回首雖旦晚去國尚存喘息安能已于一言夫政貴行仁事在徵實若以虛詞當實惠以詔旨為戲言無論人心皇惑即宗社大計將焉賴之昨歲宮闈太慶臣在危病之中不覺喜躍恭草二詔以上中所條列仰模 皇上維新

德意不謂 御筆勾去數條未盡海內之望又
豈謂今日即詔內之事尚未舉行也况詔外之
事乎在閣二臣對臣洒泣揭帖之外無計可施
皇上宜自念宗社生靈之重為憂勤振刷之圖
何待臣下諄諄也若臣則血氣已耗形神久離
新政行則臣含咲入地不行則含恨入地終無
神醫靈藥起死回生以效尺寸之報七十二懇
盡出血誠乞賜哀矜罷免乃新政中第一善政
其餘更望次第舉行天下猶可為也臣無任痛

哭流涕叩頭哀懇之至

四月十一日

七十三懇疏

奏為病苦日劇祈天力窮七十三懇乞恩罷免
以光新政事臣積病積苦困頓牀簀今已一載
有加無瘳昨又瀆陳恭候 明旨將謂生還有
日不意尚蒙誤留不勝感慟蓋悶絕良久而始
蘇也竊念臣之一身自頂至踵孰非 皇上覆
載生成之賜寧不欲湏臾忍死靜聽處分顧臣
今日命如游絲神思沉迷魂魄顛倒眼光浮動
若有若無惟耳亦然但聞人聲不辨人語百節

疼痛焦灼如烹旬日之間齒落幾盡不過一朽
骨枯骸無復比于人數矣 皇上亦知臣萬難
再起不過羈縻時日視同贅疣耳獨不念朝常
不可重損國體不宜久辱乎臣于往年亦曾告
病然何敢如今之瀆正為其時筋力猶可勉強
今則不然一身猶厭其多久留徒滋罪戾不敢
復冀致仕亦不敢復求予假第賜骸骨放還田
里一字一血絕無虛飾伏乞乾斷俯從臣請臣
苟活一日銜感一日無任顙祝涕泣之至

七十四懇疏

奏為七十四懇祈恩賜骸以明人臣分義事臣
屢疏乞罷仰干宸聰每草一疏輒增一病豈
好為多事誠以尸居彌久罪戾彌深不能已於
瀆請也近日恭遇徽號禮成兩賚內閣尚及
于臣且循舊例視在直二臣有加臣萬分踧踖
至於節時賞賚亦復相及誠欲控辭尊賜而不
敢每拜一賜魂驚汗浹無地以自容也即閣中
公題尚列臣名尤涉欺罔所當改正總因臣控

請不虔朝籍猶在是以名不正言不順旦暮入地之人豈宜復增多戾跋前踴後狼狽已極惟有一去庶可稍贖耳令甲病滿三月者放回原籍近制病真者不必三月堂官即與題放今臣患病乃滿一年無人不知當去而無人為臣代題若謂臣猶可留則是臣之七十四懇乃七十四欺也何可傳聞于天下後世臣無他長獨此小心敬畏一念自誓決不敢欺伏乞 皇上矜憫愚誠早發乾斷賜臣骸骨使臣免顧望曠誤

之誅無任哀號流涕之至

五月初六日上

此疏時揭帖到閣歸德大發怒謂閣中公
題尚列臣名尤涉欺罔所當改正嫌于說
他欺罔耳面叱小价至于淚下小价言本
已投入不能取也求人之深如此

七十五懇疏

奏為病淹經年辱國已甚懇祈宸斷早放還
山事臣乞身之章凡七十五上矣從來求去未
有如臣疏之多自非陰陽之患難居豈忍煩瀆
至此皇天后土實所鑒憐何期聖慈未即
矜允頃為去年玉牒進呈河州大捷又為永思
王寫冊寫旌因臣名籍尚存欽賞銀兩表裏三
及于臣此尤不安之甚臣有罪無功既負恩矣
久病偷閒死在旦夕而猶以羈縻之蹤屢厪駢

蓄之賜是負恩之中又負恩也隆恩自天無福
消受恩亦是苦官如羈勒無路解脫官亦是苦
身同桎梏百病煎熬身亦是苦入夏以來心火
炎熾幾欲狂顛閉置旅舍生意都絕 皇上不
即釋放不過日樵月悴一旦溘死為異鄉游鬼
而已縱未即死而心已不能謀政身已不能造
朝經歲歷時偃卧呻吟挂名仕版為丞弼首國
事墮壞由臣閣體玷損由臣豈不仰累 聖政
為古今一罪案乎 皇上容臣如天地之容朽

物有罪不加譴呵無用不即吐棄臣豈不感但
容之太過害生于恩必將大麗於法而反至於
不得容何如鑒其病苦早賜便間此容更為尤
大也殘喘如絲懸于 皇上伏望 皇上超拔
而生全之比之蕃庶晉錫萬萬有加矣臣無任
號泣待命之至

五月十九日上

聞言增懼疏

奏為聞言增懼請乞亟圖治幾以保大業早放
罪臣以息流言事臣之求去已經七十五疏病
篤至此豈能久生延生猶幸豈能復出臣身已
矣如國家何頃見邸報鳳陽巡撫都御史李三
才一本為極陳國家治亂大關懇乞 聖明省
覽收拾事內言恩詔既布旋復中厄道路所傳
其說有二一謂前日新政原非 上意不過一
時喜心旋開旋蔽三才之論誠 皇上所宜聽

覽而深思者一謂臣一貫恐沈鯉朱廢逼已之位既忌其每有諫說形已之短又耻其事不由已欲壞其成賄買左右百計相傾或冷言熱語以惑聖聰或借秦指漢以激聖怒遂致一應好事俱不得行此一語也即三才不之信必能諒臣臣聞此言寧不驚心而刺骨也臣每被人言輒請皇上為證心實不安顧事關密勿人所不知而天獨知之不得不求明於皇上夫新政一行自朝廷以至九邊人人歡慶處處

寧妥如陽春和暢一草一木皆受君賜臣雖退
伏草野臣身臣家臣之子孫臣之宗族親友實
咸利賴心非倒生獨不願太平乎方今之時合
天下士大夫群口群力以挽氣運之衰感至
尊之心猶恐不逮而可更離氣類增多隙端負
而又負臣豈無鬚眉面目乎臣幸遇皇上之
知何待左右之助皇上御下甚嚴非寄聽于
左右之主冷言熱語以惑聖聰者何詞借秦
指滇以激聖怒者何事其有其無難逃睿察

皇上屢命臣出二輔亦勸臣出臣自以病求去
或留或去判然兩途何嫌于逼何忌于形而壞
其成臣不能成宜望二輔之成成則目前可以
稍寬身後亦免餘責臣利甚大終不成則罪終
不可釋而國家之大命隨之臣禍甚大臣何忌
二輔之成也流言止于智者宜三才未之信抑
或有舌人鼓扇其間以甚臣罪亦不可知則剖
心自明臣何容已臣自戊戌獨直屢疏乞增閣
僚蒙簡二臣喜極欲舞蓋臣在翰林時仰止二

輔自謂不如深慶國家得人而亦幸已有所請
益也數年以來此羨彼調心心相照即今可以
求去正恃二輔在閣而道路之言似此掩臣素
心離臣素交臣竊自傷其德薄不能感動人至
此 皇天后土 九廟神靈實鑒臨臣臣若一
毫忌二輔阻新政之心雷霆下擊臣死不恨臣
自入春以來政事不預俸給不支書揭不收交
游不接門外若天涯此身如夢中而猶不免于
人之疑則無他焉總因新政未行故耳總因臣

身未去故耳然求去而瀆聽如臣古今所未有也求去而增口如臣古今又未有也臣是以仰天哀號而祈 皇上少加矜憐賜一俞命也舊年宮闈大慶禮宜頒詔其時臣未謝事恭草

二詔偕二輔一一詳定以進此乃臣等仰窺德意之浩蕩如天浸漬如海乘此機運而一對揚之隨蒙 嘉納批寫發行內 御筆增減者甚多何者不出于 上意第因 皇上每事濡遲近於吝惜道路之口遂謂無意求治 皇上之

心不白而臣等之心益昧矣今日所祈惟皇
上設誠力行見諸事實使天下關其議天之口
而轉為頌天之謠二輔雍容于廟廊臣亦歌謳
于耕鑿以畢一時同心體國之誼豈不至盛至
盛偉事歟幸勿久留此而不發失天下心也臣
之立朝最為孤立未嘗求天下士大夫之助豈
求左右之助流言之意只為皇上留臣而不
放群臣彈之又不敢所以日深一日臣愚不識
皇上不放臣出于何意必宜早加聖斷一允

呼之至

五月二十七日
上六月初四日奉

臣去方今之時臣不但為人所棄抑病實深為
天所棄萬萬無再留之理今七十六懇矣伏乞
早效孤臣解臣寃業臣無任哀泣徬徨禱祈號
聖旨宮闈大慶詔草皆出卿手豈有忌二輔阻新
政之理且朕前誰敢進言昨已有御旨說明了卿
不必再辯一應詔條正在次第舉行豈遂中厄卿
以疾薦求去朕已洞悉時下且宜靜攝以俟後命
吏部知道

七十七懇疏

奏為聞命驚惶彌增病困七十七懇仰祈天心
開照早放還山事臣聞舟車不行全侶相詬薪
米不續一室徧譴事固有相左而相成者昨總
漕都御史李三才之疏皇上何督之深而加
之罰也臣聞之驚惶無措臣經歲杜門請告未
允人之流言何所不有三才以聞于上特借此
以贊新政之行今新政未行而遽加顯罰病戾
餘生又不得去從此以後臣被言當愈多而獲

罪當愈甚矣此臣之所以聞命而隕越也惟臣
之䟽 皇上洞悉薦疾諭以靜俟後命臣舉家
大小如死中更生而望就途之有日臣數日以
來病乃少甦始知人耳是用焚香對天百叩百
稽齋潔肅虔復為瀆請伏乞 聖慈弘開天網
縱放羈囚使臣猶得苟延餘喘不增多戾則臣
有辭于天下而天下信 皇上雄斷迅發前旨
不虛矣臣無任涕泗徬徨哀祈懇禱之至
初六

上日

七十八懇疏

奏為七十八懇仰祈信前旨放病臣以全終始
事臣老疾危篤當去無疑昨蒙 皇上哀憐令
臣恭俟後命且念及前輔趙志臯引以為喻臣
不勝感泣即今時事甚多與志臯之時不同往
者 皇上不聽志臯之去終殞都下 聖心惻
然為之矜憐今豈復使臣為志臯之續伏想至
仁必所不忍臣此兩月病委愈重旦夕難支惟
恐溘先朝露以至損辱國體 聖世進退大臣

以禮留臣不但累臣而又累及他人臣實惜之
早放還山臣得死所而朝廷寧帖伏乞 聖心
加憐無忘前旨即賜允退全臣晚節臣無任戰
兢哀懇之至

六月十三日上

無端污蔑萬死難甘疏

奏為無端汙蔑萬死難甘懇乞 聖明亟賜罷
斥以謝人言勅下查勘以昭公道事臣賦質愚
澹本無競心不幸處非其地豈惟侮辱之不免
今大患又至矣臣乞去之急更無此比惟 皇
上久不放臣人恐死灰復燃而更相溺之不知
臣之為灰滅盡已久此寃此苦無從控訴敢請
問 皇上所以久留臣者何故祇因久留遂有
買結左右忌阻二輔之誣遂有陽為退避陰實

彌縫之誣屢變其說愈出愈奇昨見邸報有南京御史孫居相叅臣姦貪一本臣讀之口噤色勃不覺厥死數四諺曰盜憎主人民惡其上虎豹遠于人群而人爭搏之利其皮也臣之皮猶在宜擊搏者踵至臣之見攻已一歲所百計洗索身無完膚若有姦貪何人不言而待至今日臣亦人也豈無忿恚徒念大臣之道當以忠厚立身休容待物寧人負我毋我負人故隱忍曲受何應脫空駕虛一味誣捏雖在川海豈不騰

溢然臣終不盡言也姑就其疏而辨之凡納賄者必攬權自臣輔政未嘗參預部院一事終年累月無人至臣之門納賄何由凡植黨者資其助也數年以來人之斷斷臣者何限絕無一人出一語以助臣植黨何在麻承勲麻承蕙納賄之事今遍查承蕙並無此名昔年有麻承訓麻承恩科道以參本兵田樂且下其人于詔獄送法司矣當時未嘗及臣也今又以移誣臣耶展轉駕空昭明甚麻氏與居相皆山西人也名

尚不真事寧得實乎楊應龍之誅總督有李化龍巡撫有郭子章又有三省監軍御史司道等官不獨一江鐸在軍中也鐸安能獨以其所積之物越萬里而饋臣破國之日文武將士有二十餘萬人今具在可質問矣臣念陳璘劉綎等功特諭到閣欲行封拜臣以為不可上揭執止使臣嘗受其饋而許其封此時順旨而行最甚便事何為諫止且此事蒙皇上納諫如流定于密勿未嘗經科道參論也王惟忠大奸賊

拿到之日臣票下詔獄好生打問招成之日復
票嚴旨着法司用心刑鞫詳供重擬今見在詔
獄必不輕恕與臣何親臣何嘗庇自臣入閣以
來並不曾考監生為中書今云受吳汝元之賄
考中上疏旨從中格此何年何月之事既無此
事何得謂臣授意同邑考官果得中式影響何
在也進士項鼎鉉考館進呈拆卷之時臣與同
考李戴馮琦等查對殿試卷子筆跡不同臣即
時上揭叅退可謂至公該科之叅乃在臣叅之

後發覺者非該科也。鼎鉉自請覆試久之不出部覆降調臣何私之世豈有受其賄而發其弊者乎。孟宗文總兵廣東有無冒功臣不能知勘在御史覆在兵部潘大復之陞遷與其辨復有無與主臣不能知事在吏部其人皆在可以質對不可以賄汙臣賈應元以侍郎家居臣未嘗游揚其名彼老于仕途雖至愚人不應為臣指騙未預廷推尚爾汙臣若曾經推又當何似各處礦稅內官叅隨司房若有臣所用跟隨之人

豈無姓名臣家僮數人悉皆見在沈士問不知
何人既有妻在可一鞠而明矣沈子木家于湖
州於臣為同姓又隔府甚遠不為臣之姻親可
知也指為臣黨者不過龔郭正域本中語耳同
朝大臣至必賄相汙其云天下章疏有關於
臣者子木匿不以聞不知何人之疏何不一指
其實也又言朝覲進表考滿官有送門生故吏
有送夫往來交際自古有之臣素不以苞苴自
汙人所共曉且交際與賄賂不同臣不能予人

奪人饋臣何為又言臣子泰鴻歸時用車數百
輛臣一室斗大安所貯如許物用車如此用船
當稱驛遞中可查而知也且居相臣門生之門
主也嘗為外吏其朝覲行取時饋臣幾何居相
不饋尚得此官臣不受賄亦可類見何乃受人
指使而遽忘其身所經歷之事乎上有天理中
有人心傍有鬼神古稱萋菲貝錦亦須稍依事
實加以裝點說小成大何至為此夢語臣一意
求去不與人分辨見臣不辨固易為侮當事年

久所任勞怨極多欲加臣罪何患無辭今稅務未罷缺官未補科道未選章奏未通儘足坐臣之罪何必更生枝節一官之為臣累乃至於此求一罷官之難乃至于此一日不去則忌臣嫉臣而魚肉臣者不休皇上如有意憐臣則幸放臣如欲罪臣亦早正明誅以示天下幸勿久留不決為熙朝日增恠事人急則呼天呼父母臣急極矣皇天最遠臣呼之亦當聞皇上孔邇臣呼之猶未聞人之擊臣者既苦臣皇

上之容臣又苦臣臣何所歸命垂死之人一切
是非毀譽皆身外物忠奸清汙無足較擇惟願
皇上早放臣出國門使朝端早就寧息亦畢臣
報國之意仍乞將居相本勅下各衙門一一查
勘臣罪若真甘受斧鉞如若不真亦昭公道之
不泯此係柄世者之責臣無預矣臣無任驚惶
隕絕痛哭俟命之至

六月二十五日上
七月十六日奉

聖旨卿輔朕多年持廉奉公任怨任勞贊襄籌畫
朕所鑒知公論亦自難泯何須以人言求勘卿求

去之疏至八十上朕心惻然情詞愈懇何忍勉留
准給假回籍調理以明卿昭雪志意着差官護送
馳驛去仍賜路費銀一百兩彩段六表裏卿宜善
攝痊可之日撫按具奏召用該部知道

此係 聖上親手御批七月十六日下又
同日下歸德告老本准致仕賜銀五十兩
綵段二表裏差官護送馳驛去亦出手
批 聖上最密紅本發下人始知也

人言踵至疏

奏為人言踵至朽骨難勝懇乞 亟賜罷歸以
救危苦仍勅併勘以明顯誣事臣經年乞身
皇上以趙志臯比臣臣之時非志臯之時也志
臯不得去猶可醫藥從容以至老死臣則不然
外難慘于外感內憤劇于內傷頃刻難居安能
待久疏至八十上乃古今希絕之事 皇上何
難一放而苦臣至此人臣求做官難求去官易
臣之去官獨難因不即去遂日增惡名大可悲

矣昨南道御史孫居相論臣姦貪臣具本略辯
今南科陳嘉訓又有疏至大抵與居相相同除
陳璘江鐸孟宗文賈應元王惟忠等事臣前疏
已具程守訓與王惟忠同一事亦不必再辯其
科道陞遷一節按舊例科道間陞京堂而無九
年考滿者近來多至九年部院議以京堂處之
此亦一時義起臣但依部院所擬耳何機械之
有臣當事任以公事來者宜與接見若指為密
謀坐畫奔走承順必絕人逃世而後可臣無私

黨誰不知之。薊遼總督蹇達會推起用，乃合朝公論。當時無議，何得以賄誣臣萬金之饋？自川江達鄆縣經萬里長途，豈無一人指證？張似渠舊為臣府推官，離任已久，因其與達同鄉而誣之為通實跡，安在兵部所掌？乃軍機大事，用兵之時尚書田樂蕭大亨豈無商確？方將綏靖疆宇，何債帥之能堪而至為分贓之說？無復人理矣。考察拾遺例無盡去，陳用賓戴耀之留從衆議也。若以此等為賄，何事不可橫誣？至于家僮

李四蠢然一物僅供奔走何所知識而能致人之賄益令臣媿死暮夜之金古人亦誓知于天地未易與人分辨抑爭名于朝爭利于市臣如貪濁必不固請山林所嗟束身修行至于白首此言何為至于前是以自撾自責而傷厥死之復甦也病廢之人久留長安譬之敗梗枯枝當人門路有妨趨走宜乎指為不祥目為妖孽愈久則愈增其恠矣臣氣息奄奄哀鳴絮聒惟皇上俯賜矜憐拔之苦海遺歸魚龍無玷聖

朝仍乞勅下大小九卿一一從公詳勘定議以
明公道臣無任剖肝瀝血惶悚悲號之至
上七日

是時前疏未下故復有此

瀝血鳴冤疏

奏為瀝血鳴冤懇祈 聖明早賜裁斷以昭至
公事臣忝塵揆路荏苒歲年碌碌庸庸無所軒
輊惟此清修一念盟之天地鬼神誓不敢秋毫
污玷叩累清時也乃被南京科道孫居相陳嘉
訓以賊鷺臣臣是以痛死復蘇兩次臣求閒乞
罷已非一朝若得由此廢黜正愜本懷何必更
與辨論顧思立身報國惟此名節二字數十年
硜硜砥礪而以無影虛詞一筆掃盡今天下萬

世謂皇上在御而容最無耻之臣久尸密勿
其于聖德聖政關係豈眇小一息尚存實不
能含忍入地矣九廟神靈昭鑒不爽皇上
英明照燭纖悉百官萬民決非盡昧本心公論
具在要見語從何來事從何起賄遺過送有何
實跡必宜廣加訪勘明結案獄若臣兩疏之中
有半字涉虛情愿寸斬以謝天下輔臣榮辱原
取聖裁斥逐誅夷悉惟上命及臣未死猶可
早正國法以申永戒倘未必真亦當一為昭雪

豈可使臣抱冤蓄憤為明時厲鬼乎况言官本
有風聞之寬臣則急望覆盆之照皇上萬幾
雖煩不宜久稽此事也伏乞 俯垂鑒察將孫
居相陳嘉訓及臣二疏亟賜檢發明布在廷大
彰乾斷以昭法紀以白臣冤誣臣不勝束身負
鎖憂惶戰慄之至

七月十三日上

得旨回籍謝恩疏

奏為謝恩事臣因老病不職致人累誣奉 聖
旨卿輔朕多年持廉奉公任怨任勞贊襄籌畫
朕所鑒知公論亦自難泯何湏以人言求勘卿
求去之疏至八上朕心惻然情詞愈懇何忍
勉留准給假回籍調理以明卿昭雪志意着差
官護送馳驛去仍賜路費銀一百兩紵綵六表
裏卿宜善攝痊可之日撫按具奏召用該部知
道欽此臣喘息聞命悲喜並集即于私家恭設

香案扶掖望闕叩謝外伏念臣僅有朴忠毫無
裨補心力空盡齟齬滋多 聖恩每賜以保全
造物愈增其憂患是以束身竢罪瀝血懇祈䟽
自厭其頻煩意已擗夫碎裂猶蒙慈視特允養
一病寵以絲綸溫渥之褒加以金幣焜煌之錫復
遣官而將護兼給傳以安行是 皇上至恩不
惟出臣于死中猶欲比臣于人數天地不足以
喻覆載父母不足以喻生成臣所以涕泗橫流
而不能自禁傾踵誓報而猶嫌其淺者也尚能

視息率群動以謳歌如即溘捐誓他生之銜結
臣不勝感戴之至緣臣病未痊不能詣闕謹
具本奏謝以聞

七月十六日上

南京吏科陳嘉訓一本奉

聖旨元輔贊政多年平播驅倭勛勦籌畫茂著勛
勞陳嘉訓這廝掇拾孫居相之唾語朋謀汙蔑太
臣好生奸比可惡本當拿究處治姑着降三級調
外任用不許朦朧推陞若再有以無影虛詞淆亂
國是的重治不饒該部知道

南京福建道御史孫居相一本奉

聖旨元輔贊政多年平播驅倭勦勦籌畫茂著勲
勞孫居相這廝雖以言職論事不思存惜國體何
乃誣讒大臣至此以致辭辨不休好生逞臆狂肆
本當重處姑且罰俸一年再若有以無影虛詞淆
亂國是的重治來宥該部知道

七月十七日發

俱 御筆親批

原缺

宜久虛臣願 皇上補大僚之缺于廷推中選
選才望者而亟點用之國事幸甚科道為朝廷
耳目糾察官邪振起事功不可少也今缺人太
多臺中尤甚內外差用極其不敷而行取諸臣
則經年待命空積于不用之地非設官分職之
意臣願 皇上下考選之旨以濟急差以廣耳
目國事幸甚昔人謂使功不如使過為懲創深
則德慧進也今註誤諸臣一經遷謫永無陞敘
錮人于 聖世惜才之謂何臣願 皇上起諸

廢滯慎加甄別而責之以後功國事幸甚獄罪
民命所關一有寃濫能傷天地之和今逮繫流
放之人推情議法不無可原冠蓋章縫尤足憐
憫臣願 皇上廣泣罪之仁熟審朝審及天下
伸理等疏察其矜疑而開釋之俾囹圄空虛國
事幸甚京師密邇胡虜外患切膚近年所恃區
區市賞耳今虜王病三娘子老耽耽其視而樞
庭少人戶曹無餉一有緩急以何支吾臣願
皇上念邊事之重多補樞臣并勅計臣治餉邊

臣治兵輦國家之門戶國事幸甚民為邦本本
固邦寧今礦稅已撤而稅猶未停夫天下財力
止有此數盈于稅課則縮于正供無恠乎敲朴
日繁而蕭條日甚凜凜乎有群起為盜之憂也
臣願皇上軫小民之窮召還中使而以理財
之計一責之戶部國事幸甚王道本乎人情
聖王必加體念今差滿多時而不得代白首郎
署而不得遷羈旅都門而不得補謫徒邊徼而
不得還困頓拂鬱人情何堪臣願皇上體群

下之情咸與罔適毋令宛結愁憤以干和氣國
事幸甚語有之多藏者厚亡聚財既多罕能善
散今內帑之積充滿衍溢聞之四方非為美談
播之虜中尤滋隱患虜性貪鄙能無生心臣願
皇上時發內帑或餉邊或助工或備賑使天下
聞散財之名而絕覬覦之心國事幸甚國家初
造燕京永樂辛丑三殿成而輒災因循勿議直
至正統辛巳歷四十年而始成營造之難如此
今水衡無錢諸帑交匱畿輔內外無復中人家

產可供舖商之役號泣流徙誰與守國臣願停
殿門之工寬展歲時俟財充力贍而後圖之國
事幸甚至千經筵日講諷詠詩書穆清閑暇可
以怡 聖情聞見弘多可以恢 聖智 皇上
宜增補講官以資啟沃其 皇太子福王睿齡
正茂尤宜及時進修瑞王今亦長成可以及時
出閣玉雖精粹功在琢磨書曰念終始典于學
一日學則有一日之益此尤臣切望于今者也
臣荷高厚之恩子子孫孫無能為報惟 皇上

采臣餘忠則紀綱復張政事復舉天意可回人
心可收疆場永固宗社永安臣雖去國猶賢于
留臣言止矣自今日以往殘喘苟延歌帝力
于耕鑿隆恩未報祝聖壽于華嵩臨疏哽咽
不知所云